

**FEDERALNO MINISTARSTVO RADA I SOCIJALNE POLITIKE  
EKONOMSKO- SOCIJALNO VIJEĆE ZA TERITORIJU FEDERACIJE  
BOSNE I HERCEGOVINE**

Broj: 03-34/19-68/13

Sarajevo, 29.01.2013. godine

**Z A P I S N I K**

sa 93-17. sjednice Ekonomsko-socijalnog vijeća za teritoriju Federacije Bosne i Hercegovine, održane dana 29.01.2013.godine u 14 sati.

Sjednicom predsjedava gospodin Edhem Biber, predsjednik Ekonomsko-socijalnog vijeća. Sjednici prisustvovali:

Iz delegacije Vlade:

Nermin Nikšić, premijer Vlade Federacije BiH i ministri Ante Krajina, Vjekoslav Čamber, Enver Bijedić i Zukan Helez.

Iz delegacije Sindikata:

Ismet Bajramović, predsjednik Saveza samostalnih sindikata BiH, Salih Kruščica, Rifat Mahmutović, Omer Sikira, Šaban Kadirić, Avad Bahto i Selvedin Šatorović.

Iz delegacije Poslodavaca:

Mladen Pandurević, Edin Ibrahimpašić, Tomislav Slišković i Selim Babić.

Sjednici nisu prisustvovali: Jerko Ivanković-Lijanović, Erdal Trhulj, Safudin Čengić, Seid Kapetanović i Predrag Čović.

Osim članova Ekonomsko-socijalnog vijeća sjednici su prisustvovali: Zijad Krnjić, direktor Federalnog zavoda za penzijsko i invalidsko osiguranje, Jasna Hasić-Slijepčević i Zilha Ademalj iz Zavoda za zdravstveno osiguranje i reosiguranje Federacije BiH, Mica Nikačević i Sead Pita iz Federalnog zavoda za zapošljavanje.

**DNEVNI RED**

1. Usvajanje zapisnika sa redovne 92-16. sjednice ESV-a;
2. Prednacrt zakona o unutrašnjem platnom prometu;
3. Finansijski plan poslovanja za 2013.godinu: Federalnog zavoda za zapošljavanje, Federalnog zavoda za mirovinsko/penzijsko i invalidsko osiguranje, Zavoda zdravstvenog osiguranja i reosiguranja Federacije BiH;
4. Informacija o Strategiji reforme penzijskog sistema u Federaciji BiH;
5. Izveštaj o radu ESV-a za 2012. godinu i realizacija zaključaka ESV-a;
6. Razno.

Predloženi dnevni red je usvojen.

## **Ad. 1**

Sugestija predstavnika Sindikata ( Ad. 5) da se o usklađivanju neto (bruto) satnice socijalni partneri ne dogovaraju na sjednicama ESV-a, predstavnici poslodavaca nisu prihvatili i smatraju da se u drugoj alineji iz teksta treba izbrisati riječ „automatski“. Nakon toga zapisnik sa predhodne sjednice je usvojen.

## **Ad. 2**

Obrazlažući Prednacrt zakona o unutrašnjem platnom prometu, ministar finansija FBiH Ante Krajina je rekao da je temeljni cilj novog teksta stvaranje pravne osnove za efikasniji postupak prisilne naplate i uspostavljanje mehanizma koji će, u situaciji neplaćanja obaveza dužnika, osigurati blokadu svih sredstava na njegovim računima kod ovlaštenih organizacija, do konačnog izmirenje duga.

Federalni ministar prometa i komunikacija Enver Bijedić predložio je amandmane po kojima bi javni poštanski operateri u Federaciji BiH (JP BH Pošta d.o.o. Sarajevo i Hrvatska pošta d.o.o. Mostar) bili ovlašteni za obavljanje dijela poslova unutrašnjeg platnog prometa, i to obavljanje uplata i isplata gotovog novca fizičkih lica, a Agencija za bankarstvo bi kriterije za izdavanje dozvole za obavljanje unutrašnjeg platnog prometa dostavljala Vladi FBiH na saglasnost, prije njihovog konačnog utvrđivanja.

Predstavnici Poslodavaca podržali su navedene prijedloge i postavili su pitanja koja se odnose na jasnije definiranje „glavnog računa“ i organizacija koje mogu vršiti naplatu na osnovu sudskog naloga. Također su iznijeli da se ne slažu sa članom 22, smatrajući da Vlada pokazuje opredjeljenje za naplatu svojih potraživanja, a zanemaruje druge, te da je plaćanja po sudskim presudama na 6. mjestu prioriteta nezakonito. Ujedno predlažu da se, radi racionalizacije i efikasnijeg funkcioniranja platnog prometa, za plaćanje javnih prihoda koristi jedan račun, koji bi se zatim procentualno dijelio pripadajućim oblastima.

Predstavnici Sindikata suglasni su sa amandmanima koje je predložio resorni ministar. Postavljeno je pitanje ovlaštenja Agencije za bankarstvo i čime su ona regulirana, te predloženo da se Prednacrt zakona o unutarnjem platnom prometu nakon javne rasprave ponovo razmatra na ESV-u.

## **Zaključci:**

- **ESV prihvata amandmane po kojima bi javni poštanski operateri u Federaciji BiH (JP BH Pošta d.o.o. Sarajevo i Hrvatska pošta d.o.o. Mostar) bili ovlašteni za obavljanje dijela poslova unutrašnjeg platnog prometa, i da Agencija za bankarstvo kriterije za izdavanje dozvole za obavljanje unutrašnjeg platnog prometa dostavi Vladi FBiH na saglasnost, prije njihovog konačnog utvrđivanja;**
- **ESV će nakon provedene javne rasprave ponovo razmatrati predloženi tekst Zakona o unutarnjem platnom prometu;**
- **U radnu grupu koja radi na racionalizaciji platnog prometa trebaju biti uključeni i predstavnici Poslodavaca i Sindikata;**
- **Prijedloge predstavnika Poslodavaca tretirati kao javnu raspravu, a nadležno ministarstvo na njih treba dati povratnu informaciju.**

### Ad. 3

Direktori Federalnog zavoda za zapošljavanje, Federalnog zavoda za mirovinsko/penzijsko i invalidsko osiguranje, Zavoda zdravstvenog osiguranja i reosiguranja Federacije BiH pozvani su na sjednicu ESV radi rasprave o finansijskim planovima poslovanja njihovih zavoda za 2013.godinu. Na poziv se odazvao samo direktor Federalnog zavoda za PIO/MIO, gđin Krnić, dok su u ime ostala dva Zavoda bili prisutni zamjenici direktora.

Stav predstavnici Poslodavaca bio je da će prisustvovati raspravama ukoliko je prisutan direktor Zavoda, te da su spremni saslušati samo direktora Krnića. Zbog potrebnog kvoruma takav prijedlog je prihvaćen.

Direktor Federalnog zavoda za PIO/MIO iznio je finansijski plan poslovanja za 2013.godinu, a zatim dao obrazloženja i pokazatelje koji govore u prilog veoma značajnih ušteda u odnosu na predhodnu godinu. Broj zaposlenih je smanjen za 135 ljudi, nivo rashoda po osnovu plaća za 15% u apsolutnom iznosu, te ostale uštede kao što su zavidno smanjeni bankarski troškovi, broj savjetnika smanjen sa 11 na 4 i drugo, u cilju racionalizacije i održivosti fonda. Ukoliko ne dođe do nepredvidivih poremećaja, plan za 2013.godinu je realan i ostvariv.

Provedena rasprava, uglavnom prema prijedlozima Poslodavaca, rezultirala je zaključcima ESV-a:

- **Data je podrška racionalizaciji poslovanja Federalnog zavoda za mirovinsko/penzijsko i invalidsko osiguranje;**
- **ESV traži pokretanje inicijative za izmjene i dopune zakona (Zakona o penzijskom i invalidskom osiguranju, Zakona o posredovanju u zapošljavanju i socijalnoj sigurnosti nezaposlenih osoba, Zakona o zdravstvenom osiguranju) koje bi omogućile, u skladu sa Konvencijom o minimalnoj normi socijalnog osiguranja 102, učešće socijalnih partnera u upravljačkim tijelima Zavoda;**
- **ESV traži da se finansijski planovi poslovanja Zavoda dostave u ESV na raspravu prije nego budu usvojeni.**

### Ad.4

Na zahtijev Vlade FBiH, a u skladu sporazuma sa MMF-om, imenovana je radna grupa za pripremu okvirnog teksta Strategije reforme penzijskog sistema u Federaciji BiH. Pripremljeni tekst Strategije razmatrao se na 69. sjednici Vlade FBiH od 18.12.2012.godine.

Informacije vezane za Strategiju reforme penzijskog sistema u Federaciji BiH iznio je resorni ministar. Opći ciljevi Strategije su sprečavanje socijalne ugroženosti, snaženje prvog stupa mirovinskog osiguranja, uvođenje dodatnih oblika osiguranja, vraćanje povjerenja u mirovinski sustav, zadovoljenje potreba klijenata, promjena parametara mirovinskog sustava, primjena dobre prakse, itd.

**ESV-a je donijelo zaključak da se okvirni tekst Strategiji reforme penzijskog sistema u Federaciji BiH, razmatran na 69. sjednici Vlade FBiH od 18.12.2012.godine, treba dostaviti svim socijalnim partnerima. Rasprava o tekstu strategije biće uvrštena u dnevni red jedne od narednih sjednica ESV-a.**

## **Ad. 5**

Usvojen je izvještaj o radu ESV-a za 2012. godinu, sa realizacijom zaključaka ESV-a.

## **Ad. 6**

Predstavnici Sindikata, odnosno Savez samostalnih sindikata BiH, predlaže da Upravni odbor Federalnog zavoda za zapošljavanje formira savjetodavnu komisiju, shodano odredbama Zakona o posredovanju u zapošljavanju i socijalnoj sigurnosti nezaposlenih osoba, u čijem radu bi učestvovali predstavnici Sindikata i Poslodavaca.

Predstavnici Poslodavaca traže da ESV uputi resornom ministarstvu upit o provedenim aktivnostima na formiranju Nadzornog tijela za praćenje implementacije Pravilnika o upravljanju ambalažom i ambalažnim otpadom, u kojem je ispred ESV-a delegiran jedan predstavnik Poslodavaca.

Također su predložili da se sljedeća sjednica ESV-a održi u prostorijama Arcerol Mittal u Zenici. Prijedlog će biti razmotren na sastanku Kolegija ESV-a.

Sjednica Ekonomsko-socijalnog vijeća zaključena je u 17:00 sati.

Na kolegiju ESV-a bit će utvrđen dnevni red i datum održavanja naredne sjednice ESV-a.

Zapisnik pripremila  
Snježana Kapić

Predsjednik  
Ekonomsko-socijalnog vijeća  
Edhem Biber